

禹貢古今合註

禹貢古今合註卷之五

雲間夏允彝譔

鹿城門人李開鄴較

九州攸同四隩旣宅九山刊旅九川滌源九澤旣  
陂四海會同

堯遭洪水道路阻絕今水土旣治天下大同故  
總叙之所攸同者何四海之隩咸奠居矣九州  
之山刊槎其水旅祭之矣九州之山滌除泉源  
無壅塞矣九州之澤已皆陂障無決溢矣四海  
之水靡不會同而有所歸矣州注也郡國所注

仰又疇也。疇其土而生之。又長城者爲州。州之言殊也。合同類異其界也。天有九道。地有九州。天有九部。八紀。地有九州。八柱。人皇氏依山川土地之勢。財度爲九州。人皇居中州。以制八輔。顓頊至禹。皆爲九州。舜以冀州廣大。分爲并州。幽州。分青州爲營州。至禹復爲九州。商之九州。則冀、幽、營、兗、徐、揚、荆、豫、雍也。周之九州。揚、荆、豫、青、兗、雍、幽、冀、并也。漢承秦制。分天下爲郡國。而復以十三州統之。改雍曰涼。梁曰益。增交趾爲

交州。晉分爲十九州。自晉以後。爲州彌多。所統  
彌狹。離析磔裂。禹制不可復問。唐分天下爲十  
道。後爲十五道。宋爲十五路。已又增三路。又爲  
二十三路。國朝爲兩直隸。十三省。而州各并亡。  
禹州之與舜異者。禹主于治水。幽并營皆北方  
廣莫之地。罹水患少。故幽并統于冀。營統于青。  
時四夷來王。封域極廣。肇十有二州。後有作者  
不可及矣。周時大約與禹同。但淮與大野。在禹  
貢徐州之川澤。而職方青州之川淮泗。兗州之

澤大野。是以徐而入青。兗矣。華陽。璆鐵。磬磬。在禹貢爲梁州之山。與貢也。而職方豫州之山華。雍州之利玉石。是以梁而入雍。豫矣。禹貢豫州曰。被孟諸而職方以望諸。隸青。是青之入豫也。禹貢青州曰。鹽。海物。而職方兗州曰。其利蒲魚。是兗之入青也。蓋周以禹之冀州分而爲三。以禹之八州合而爲六。省去徐州者。蓋洪水之害。淮河爲大。禹于其下流。施功爲多。故建徐州。周時。碣石淪于海。正東之地不及于虞。故有青。

究則雖革徐而東方地不爲有餘也。并梁于雍者。以雍爲王畿。居中制外。梁爲雍阻。固故合之。以爲王畿形勝也。蓋州始於人皇。州統縣。縣統郡。始于周。郡統縣。始于秦。州統郡。郡統縣。始于漢。割據之世。置州乃多。至隋而州郡相等。唐乃混州郡爲一。宋始有府。猶與州並置。不相統。其在于今。府始大而州益小。蓋與縣等矣。古者之制。八家爲隣。三隣爲朋。三朋爲里。五里爲邑。十邑爲都。十都爲師。州十有二師。蓋州凡四十三。

萬二千家。禹平水土九州之地。凡二千四百三十萬八千二十四頃。定墾者九百二十萬八千二十四頃。不墾者千五百萬二千頃。民口千三百三十三萬三千九百二十三人。其土宜風俗之異者。青徐角羽集。寬舒遲。人聲緩。其泉醜以酸。荆揚角徵會。氣漂輕。人聲急。其泉酸以苦。梁州商徵接。剛勇漂。人聲籌。其泉苦以辛。兗豫宮徵合。平靜有慮。人聲端。其泉甘以苦。雍冀合商羽。端駛烈。人聲絕。其泉酸以醜。冀州堯都所在。

疆域尤廣。山東之人。性緩尚儒。仗氣任俠。而鄴郡高齊國都。浮巧成俗。山西土瘠。其人勤儉。而河東魏晉以降。文學盛典。閩井之間。習于成法。并州近狄。俗尚武藝。左右山河。古稱重鎮。揚州人性輕揚。而尚鬼。好祀。每王綱解紐。江淮濱海。地非形勢。不暇先爭。然長淮大江。皆可拒守。閩越遐阻。僻在一隅。難以得撫。兗州地非險固。風雜數國。每戰爭之時。傷夷特甚。宇內平一。又如近古之風焉。青州號稱強國。憑負山海。擅利鹽



鐵。人情變詐。好行機術。蓋因輕重而爲弊也。徐州鄆魯之境。蔚有儒風。而分裂之代。彭城要害。爲天下所必爭。講誦風微矣。大抵徐兗其俗略同。豫州荆河之間。四方輻輳。故周人善賈趨利。而織嗇。韓國分野亦有險阻。土中風雨所交。可以建都立社。雍州四塞爲固。被山帶河。自秦漢建都。五方錯雜。風俗不一。邊地迫近胡戎。多尚武節。荊州風俗略同。揚州雜以蠻夷。率多勁悍。兵強財富。地迫勢危。解兵拔扈。無代不有。梁州

之民少愁苦而輕易淫佚。土沃肥無凶歲。四塞險固。王政激缺。拔扈先起。此九州之大略也。論語摘輔象曰。兗豫屬上台。荆揚屬下級。梁雍屬上中。冀州屬下級。青州屬下上。徐州屬下下。淮南子曰。東南神州曰晨土。正南次州曰沃土。西南戎州曰滔土。正西兗州曰并土。正中冀州曰中土。西北括州曰肥土。正北濟州曰成土。東北薄州曰隱土。正東揚州曰申土。其言之荒遠者。鄒衍云。中國于天下八十一分居其一分耳。中

國名赤縣赤縣內自有九州禹之叙九州是也、  
不得爲州數中國外如赤縣州者有九、乃謂九  
州也、有裨海環之、如一區中者、乃爲一州、如是  
者九、乃有大瀛海環其外、天地之際焉、淮南子  
以爲九州之大純方千里、九州之外、乃有八殞、  
八殞之外、而有八紘、八紘之外、乃有八極、凡八  
極之雲、是雨天下、八門之風、是節寒暑、八殞八  
澤之雲、雨九州、而和中土、至佛氏以天下有四  
大洲、而中國特南洲之東、一隅引禹貢東漸于

海謂上古聖人已知震旦之介在東偏。尚有南西北海未之及也。邇者西洋氏浮海而來已歷八萬里亦分天下爲五大洲。而中國特一洲之一隅。天地至大孰能測其是非。若聲名文物之盛。即二氏以爲莫中國若也。室隅爲隩。言隩極其涯際也。又隩深也。涯內近水者爲隩。天下之山水無窮。而見于禹貢者可數。故以九州之山川統言之。或曰弱水、河、漾、江、沅、淮、渭、洛也。九山、岍、壺口、底柱、太行、西傾、熊耳、播冢、內方、岐也。

周禮所記九山爲會稽、衡山、華山、沂山、岱山、岳山、醫無閭、霍山、恒山、九川爲江、漢、滎、洛、淮、泗、河、沛、涇、汭、漳、庫池、嘔夷、九澤爲具區、雲夢、圃田、孟豬、大野、弦蒲、獮養、楊紆、昭余、祁、九浸爲五湖、潁、湛、波、澹、沂、沐、盧、維、渭、洛、菑、時、汾、潞、洙、易、爾雅十藪有大陸、海隅、焦、護、而無弦蒲、獮養。此山川之見於經者也。川言滌除泉源，從其所出，至其所入，皆蕩除之，無壅塞也。爾雅曰：泉一見一否爲澱。井一有水一無水爲澗。澗，泉正出湧出也。

沃泉縣出。下出也。沘泉穴出。仄出也。涇闕流川。過辨回川。灘反入。潭沙出。汧出不流。歸異出。同流肥。漢大山尾下。水醮曰辱。澤止水也。易解曰。天地之間。水最多。然坎爲水。而兌出于澤者。以坎乃陽水。陽主動。江河之流是也。兌乃陰水。陰主靜。湖海之滙是也。陂繁也。因下鍾水以繁利萬物也。澤言旣陂。水定之後。作陂以障之。使無決溢也。禹之導水。豈無隄防。亦惟其宜耳。周太子晉曰。山土之聚也。藪物之歸也。川氣之導也。

澤水之鍾也。夫天地成而聚于高，歸物于下。疏  
爲川谷以導其氣，陂唐汗庫以鍾其美。杜預曰  
項戶口日增而陂竭，歲決良由變生蒲葦。人居  
沮澤之際，水陸失宜，放牧絕種，樹木立枯，皆陂  
之害也。陂多則土薄水淺，潦不下潤，故每有雨  
水輒復橫流，延及陸田。其舊陂舊場皆當脩繕  
以積水。諸所造立皆決瀝之，又曰水去之後填  
淤之田畝收數鍾。至春大種五穀，五穀必豐。則  
陂澤爲利亦大矣。禹所治水惟黑水入南海餘

皆入東海而言四海者總入于海。自海圜流無不之也。又或以爲會同者九州同風萬國共貫四海之內會同于京師也。周禮職方氏辨九州之國同其貫利必先辨之於其始乃可同之于其終。禹貢所分九州別其山川貢賦者所以立其辨也。九州攸同以下又所以同之也。有以辨之則廣谷大川異制民生其間異俗五味異和器械異制衣服異宜各得其所而不亂。有以同之則同軌同文同倫各要其所而不見其異。此



疆理天下之大要也。今按禹之治水不但疏決  
江河。凡天下平土皆制其井畝。疏爲溝澮。以達  
于川。井田之制即自禹定之也。禹之自言曰予  
決九川距四海。濬畎澮距川。至孔子稱禹惟曰  
盡力乎溝洫而已。天下皆溝洫則天下皆容水  
之地。而天下皆修溝洫則天下皆治水之人。小  
水有所疏分則大水不至溢決。而水無不治則  
田無不墾。後世舉古溝洫封畛之法而盡毀之。  
水何得不爲害也哉。

六府孔修庶士交正底慎財賦咸則三壤成賦中  
邦

水火金木土穀貨財所聚。故稱府。所以孔修者  
五行一曰水。水治則六府皆治也。然六府亦皆  
有事焉。如敷土而土可宅。可藝。可作。又是脩土  
也。刊木而木漸包。惟條惟喬。是修木也。土可作  
藝。而或賦總。或賦銍桔。或賦粟米。是修穀也。苟  
金不修。則荆揚必無三品之貢。若火不修。則雍  
青安得鹽鐵之供。凡此皆孔修者也。展禽曰。五

行所以生植也。各山川澤所以出財用也。淮南  
子曰。以水和土。以土和火。以火化金。以金治木。  
木復反土。五行相治。所以成器用。夫穀出于土。  
經不言五行而言六府者。以穀之利甚大。且水  
火不資于作爲。金木自產于川澤。惟土爰稼穡。  
非力不成。故兼言之也。交正庶土以定貢。結九  
州貢篚之物也。咸則穀土以定賦。結九州九等  
之田與賦也。慎者視其土所出。不責所有于所  
無。且惟服食器用也。成賦者以萬民惟正之供。

也。夫地產美好鮮不爲崇民之所利無幾。而土之所徵無窮。至有一食物之微。一木石之異。致貽禍一方者。禹之底慎爲不可及矣。若田之肥瘠懸殊。有不易之田。一易之田。再易之田。上者或畝值一金。而下者草萊污下。募人佃之。而不得。又有陵谷變遷。浸蕩失陷者。後世差等無法。審視不勤。致下田或徵上稅。甚有無田徵稅者。則壤之法。可不兢兢哉。地之肥瘠等級甚多。而止定爲上中下三壤者。舉其大較也。三壤之中。

又各有三品。復有上下錯而總之爲三壤。禹之法亦密矣。任土之貢。生產有常。履畝之收。等藉既定。人識所出。吏難爲奸。不亦休哉。鹽鐵論曰。禹治水土。定九州。四方各以土地所生貢獻。足以充宮室。供人主之欲。膏壤萬里。山川之利。足以富百姓。不待蠻貊之地。遠方之物。而用足。蘇傳曰。交通也。正。平準也。庶土不通有無。則輕重偏矣。故交通而平準之。書疏曰。交正者。水災既除。衆土俱得其正。謂壤壚還復其性也。或曰。三

壤乃所以交正也。水土既平，財賦隨定，易生心于廣大。以三壤爲則，無偏輕重矣。賦止中邦，無勤遠略矣。且賦曰成則一成不變，并無加賦之累矣。此所謂底慎也。不言貢者，舉賦可以諒貢也。

### 錫土姓

水土平可以封建諸侯也。土以立其國，姓以立其宗，土姓錫而宗國定矣。國立而後民人有所依，宗立而後族姓有所繫。人有所依，斯有以君

之族有所繫。斯有以宗之。方水土未平。諸侯各有國土。百官亦各有族姓矣。至此而復錫之者。前乎此。惟有所不普。故復徧錫之爾。當時堯舜在上。封建非禹所得專。而實禹所經畫。所謂弼成五服也。封建立姓。皆始于黃帝。又曰。軒丘命氏。分兄弟之姓。若水降居。始建諸侯之國。自是以官爲族。因地爲宗。夫上古之民。屯冥顯蒙。猶草木鹿豕然。此其勢不至于狡鬪搏噬不止。則必就其能萃能羣者。而君之宗之。成聚成邑。成

都成圻。而封建昉焉。人皇之世。業分天下爲九區。軒后之世。選賢與能。分州畫野。並建萬國。俾各有守宇。以爲天下治。故封建者法天星土。因地山谿。順人歸往。物土方宜。實制天下之大義也。在易屯之象曰。雷雨之動滿盈。天造草昧。宜建侯而不寧。比之象曰。地上有水。比。先王以建萬國。親諸侯。不其重歟。黃帝方制萬里爲萬國。各百里。禹塗山之會。亦稱萬國。建國凡五等。而其時。海上有十里之國。湯定三等之封。凡三千



國。周定五等之封。千七百七十三國。虞夏之制。不可詳考。而夏殷之制。九州州方千里。州建百里之國三十。七十里之國六十五。十里之國百有二十。凡二百一十國。名山大澤不以封。其餘以爲附庸間田。天子之縣內方百里之國九。七十里之國二十一。五十里之國六十三。凡九十國。名山大澤不以頒。其餘以祿士爲間田。凡九州七百七十三國。天子之元士諸侯之附庸不與。由此言之。分國更少。是附庸小國多于大

國也。自封建法壞而井田雖在，不得獨存。蓋封建之君視其田，皆世業也。其民猶佃戶也。郡邑之世制地廣大，且人傳舍其官田之授受，農之上下安能時察而定之哉？史記伏羲制嫁娶，正姓氏以重人倫之本，而使民不瀆國語曰：司商協名姓。商金聲清，人始生，吹律合之，定其姓也。傳曰：保姓受氏，以守宗祏，世不絕祀。無國無之。白虎通曰：姓者生也。書云：平章百姓，所以有百姓。何以古者聖人吹律定姓以紀其族，人各具

五常而生正聲。有五宮商角徵羽。轉而相推。五  
五二十五。轉生四時異氣。殊音悉備。故姓有百  
也。觀射父曰。民之徹官百。王公之子弟之質。能  
言能聽。徹其官者。而物賜之姓。以監其官。是爲  
百姓。晉司空季子曰。同德爲同姓。同姓爲兄弟。  
黃帝之子二十五人。其同姓者二人而已。其同  
生而異姓者。四母之子。別爲十二姓。凡黃帝之  
子二十五宗。其得姓者十四人。爲十二姓。陳隨  
隱曰。因生賜姓。胙土命氏。及氏謚官邑。六者而

已今推廣爲十七類一曰以國爲氏五帝之前  
有國者不稱國以名爲氏所謂無懷氏葛天氏  
伏羲氏燧人氏者也神農軒轅雖曰炎帝黃帝  
猶以名爲氏至唐虞夏商周而后以國爲氏諸  
侯亦然魯衛齊宋之類是也支庶稱氏適他國  
則稱國如宋公子朝在韓則稱宋朝衛公孫鞅  
在秦則稱衛鞅二曰以邑爲氏原以同邑而得  
氏申以楚邑而得氏魯有沂邑因沂大夫相魯  
而以沂相爲氏周有甘邑因甘平公爲王卿氏

而以甘士爲氏、三曰以鄉爲氏、四曰以亭爲氏、  
封建五等、降國爲邑、邑有關、內侯、鄉侯、亭侯、關  
內邑者、溫原、蘇毛、甘樊、祭尹之類是也、封于鄉  
者以鄉氏、如裴、陸、穉、龍也、封于亭者以亭氏、如  
糜、采、俞、豆、歐、陽也、五曰以地爲氏、居傅巖者爲  
傅氏、徙稽山者爲稽氏、主東蒙之祀者爲東蒙  
氏、守橋山之冢者則爲橋氏、耐氏因耐、頒食于  
耐、門、穎氏因考叔爲穎、谷封人、東門襄仲爲東  
門氏、桐門古司爲桐門氏、隱于甫里、綺里者爲

甫里氏綺里氏六曰以姓爲氏姓之爲氏與地  
之爲氏皆因所居而命也得賜者爲姓不得賜  
者爲地居姚墟者賜以墟居羸瀆者賜以羸姬  
之得賜居于姬水姜之得賜居于姜水七曰以  
氏爲氏八曰以名爲氏諸侯之子稱公子公子  
之子稱公孫公孫之子以王父字爲氏如鄭穆  
公之子曰公子駢字子駟其子曰公孫夏其孫  
則曰駟帶駟乞宋威公之子曰公子目夷字子  
魚其子曰公孫友其孫曰魚莒魚石魯孝公之

子曰公子展其子曰公孫夷伯其孫曰展無駭  
展禽鄭穆公之子曰公子豐其子曰公孫段其  
孫曰豐卷豐施天子之子亦然王子狐之後爲  
狐氏王子朝爲朝氏如公子遂之子曰公孫歸  
父字子家其後爲子家氏父字爲氏者也季孫  
鉏字子彌其後爲公鉏氏父名爲氏者也九曰  
以次爲氏伯仲叔季之類是也十曰以族爲氏  
族近於次者氏之別也孟氏仲氏別兄弟也丁  
氏癸氏別先後也祖氏彌氏別上下也第五氏

第八氏以同居別也。孔氏子孔氏，旗氏子旗氏，字之別也。軒氏、軒轅氏、熊氏、熊懼氏，名之別也。季氏之有季孫氏，仲氏之有仲孫氏，叔氏之有叔孫氏，嫡庶之別也。十一日以官爲氏，太史、太師、司馬、司空是也。十二日以爵爲氏，皇王、公侯是也。十三日以謚爲氏，莊氏出于楚莊王，康氏出于衛康公，魯僖公、宣公之後爲僖氏、宣氏，文武、哀、繆皆是也。十日以吉德爲氏，趙衰人愛之，如冬日，後爲冬日，趙氏吉有賢人爲老成子，後



爲老成氏十曰以凶德爲氏英布被黥爲黥氏  
楊玄感梟首爲梟氏十六曰以事爲氏夏后氏  
遭有窮之難后緡方娠逃出自竇生少康支孫  
以竇爲氏漢武帝以丞相田千秋乘小車出入  
省中後因以車爲氏十七曰以技爲氏巫者之  
後爲巫氏以至卜氏匠氏豢龍御龍干將氏又  
有以爵系爲氏國系爲氏族系爲氏名氏爲氏  
國爵爲氏邑系爲氏官名爲氏邑謚爲氏謚氏  
爲氏爵謚爲氏大抵皆複姓而夷狄之氏不與

焉。三代之後姓氏混矣。夫天子賜姓賜氏。諸侯  
但賜氏。不賜姓。故言姓則在上。言氏則在下。而  
後世一之。誤矣。鄭樵曰。三代以前姓氏分而爲  
二。男子稱氏。婦人稱姓氏。所以別貴賤。賤者有  
名無氏。古之諸侯。詛辭多曰。墜命亡氏。陪其國  
家。亡氏與失國同。可知其爲賤也。故姓可呼爲  
氏。氏不可呼爲姓。姓所以別婚姻。故有同姓異  
姓。庶姓之別。氏同姓不同者。婚姻可通。姓同氏  
不同者。婚姻不可通。三代之後。姓氏合而爲一。

皆所以別婚姻。而以地望明貴賤。于文女生爲  
姓。故姓之字多從女。如姬姜嬴妘媯姑之類是  
也。所以爲人婦之稱。如伯姬季姬孟姜叔姜之  
類並稱姓也。孔穎達曰。姓者生也。以此爲祖。今  
之相生。雖下及百世。而此姓不改。族者屬也。與  
其子孫共相連屬。其旁支別屬。則各自立氏。禮  
記大傳曰。繫之以姓而弗別。百世而婚姻不通  
者。周道然也。是言子孫當共姓也。其上文云。庶  
姓別于下。而戚單于下。是言子孫當別氏也。傳

稱家皆爲氏。氏族一也。別而稱之。謂之氏。合而  
言之。則曰族。記謂之庶姓者。以始祖爲正姓。高  
祖爲庶姓。亦氏族之別名也。姓則受之于天子。  
族則稟之于時君。賜族者有大功德。宜世享祀  
者。方始賜之。其士會之孥。處秦者爲劉氏。伍員  
之子在齊。爲王孫氏。外傳稱知果自別其族。爲  
輔氏。此類皆身自爲之。非復君賜。釋例曰。子孫  
繁衍。枝布葉分。始承其本末。取其別。故其流至  
千百姓。萬姓未必皆君賜也。王鑿曰。今人多以

氏爲姓。姓以繫百世之正統。氏以別子孫之旁出。族則氏之所聚而已。蓋別姓則爲氏。別氏則爲族。族無不同之氏。氏有不同之族。故八元八愷。旣出于高陽氏。高辛氏。而謂之十六族。是氏有不同族也。宋氏華氏。謂之戴族。向氏。謂之桓族。是族無不同氏也。詩曰。振振公族。太史公曰。自黃帝至舜禹。皆同姓。而異其國號。又曰。秦之先爲嬴姓。其後分封以國爲姓。有十四氏。又如周本姬姓。其子孫如魯衛毛邾郟雍曹滕畢原。

鄴郇刊晉應韓凡蔣邢茅各以國氏而皆姬姓也。後之文人惟昌黎知之故曰韓姬姓。又曰與韓同姓爲近。夫先王姓氏爲重。謂姓氏必稱其功德也。後世沿末忘本。後世以降尊尚門第。有司選舉必藉譜籍。尚官之弊。至于尚姓。尚姓之弊。至于尚詐。欲通歷代之譜而別其真僞。不亦末乎。且自族別而爲姓。姓別而爲望。望別而爲房。故姓多則訛其俗。望多則訛其姓。房多則訛其望。疑舛相承。豈復可辨。春秋之時。諸侯之國。

凡一百十五。可以知其姓與爵者四十有六。晉楚之類是也。知其姓而不可以知其爵者一十有八。焦陽之類是也。知其爵而不可以知其姓者一十有七。沈之類是也。爵與姓皆不可知者三十有二。陸渾之類是也。即知其姓者亦難盡信。如以趙爲芊姓而子長以爲姬姓。以邪姓曹國爲重黎之後。又以爲吳國之後。至以姜氏爲伯夷之後。又以爲四岳之後。四岳舉伯典三禮。豈得合爲一人。子長所記本紀世家其苗裔歷

歷可稽。然堯爲舜之從高祖。而舜乃妻其女。鯀乃舜五世從叔祖。與舜同爲堯臣。湯與王季同世也。湯下傳十六世而爲紂。王季傳一世而爲文王。二世而爲武王。何懸絕至此。左氏羸姓爲伯翳之後。班固又以爲伯益之後。韋昭以伯翳即益也。孔穎達復以伯益爲臯陶之子。按史記臯陶之後封蓼。伯翳之後封秦。垂伯益之後。不知所封。是則伯益伯翳臯陶各爲一族。翳與益不得爲一人。而益不得爲臯陶子矣。今姓氏可



考者共四千六百六十五姓有傳之千古而世  
派難詳者。如大駮氏之後有隗氏、大隗氏、大嵬  
氏、鬼駮氏之後有嵬氏、饒氏、撓氏、刹氏、鬼駮氏、  
虺嵬氏之後有虺氏、嵬氏、渾沌氏之後有渾氏、  
沌氏、屯氏、吉夷氏之後有吉氏、史倉氏之後有  
倉氏、史氏、侯氏、侯岡氏、夷門氏、倉頡氏、柏皇氏  
之後有柏氏、柏常氏、常氏、柏侯氏、白侯氏、中黃  
氏之後有栗氏、陸氏、昆連氏之後有疆氏、驪氏、  
赫胥氏之後有赫氏、赫胥氏、葛天氏之後有葛

氏、權氏、尊、盧氏、之後有尊氏、尊、盧氏、罇氏、祝融氏、之後有祝氏、融氏、祝宗氏、祝和氏、祝融氏、吳英氏、之後有吳氏、有巢氏、之後有巢氏、朱襄氏、之後有朱襄氏、陰康氏、之後有陰氏、零氏、無懷氏、之後有懷氏、無懷氏、此咸在上古之世、無得而稽也、有流傳于後而誕妄難信者、如以雙姓爲出、蒙、雙、奇、姓、爲出、伯、奇、愚、出、愚、公、度、出、度、支、巢、出、冠、軍、皇、出、三、皇、春、則、自、于、春、申、有、則、自、于、有、巢、居、本、于、先、且、居、西、本、于、西、門、豹、芻、因、于、牛

衰之食芻茲因于才子之宣茲審出于面勢之  
審曲又如童出于老童洪出于共工箕出于商  
紂伊繇唐堯昌繇昌意累出嫫祖聃出聃季載  
而卑本于卑耳之國皆近謬妄夫山名非必從  
山鳥名非必從鳥國邑之名古之從邑者甚少  
邾邠郕邾之類豈皆因失國而去邑耶至言張  
本張宿柳因柳宿益無所據矣且盧雷陳甄既  
云聲轉仇求棗棘則謂仇改并其字訛之矣東  
方生曰東來爲棗而棗陽本棘陽也是棘祇棘

據之改爲棗非避仇也。世之避翼祖諱者析其字爲文苟二字而不知翼祖之諱。不從文。不從苟也。昔魯之公索氏將祭而忘其姓。人以是卜其必亡。而隨之文帝惡隨之從走。乃省以爲隋。不知隋自音妥。尸祭鬼神之物。殺裂落肉之名也。卒之國以隋裂而終矣。姓氏之來。可不重歟。祇台德先不距朕行。

此禹經理之本也。無此以爲之本。雖胼手胝足。勞其身以爲天下。能使人之不應後志也哉。夫

禹之治水，興徒衆，毀山陵，墮地脈，苟非以至誠感人，天下之怨咨無窮矣。且穿幽入深，不逢不若，非德感人神，何以臻茲。劉子曰：美哉禹明德，遠矣展禽曰：禹能以德修，鯀之功，祇德固治水之要道也。

五百里甸服，五百里賦納總，二百里納銍，三百里納秸服，四百里粟，五百里米。

既言九州同風，法壤成賦，而四海之內，路有遠近，更叙弼成五服之事，規方千里之內，謂之甸。

服日月躔次千里。故以千里象之。甸乘也。周制六十四井爲甸。甸方八里。居一城之中。成方十里。出兵車一乘。以爲賦法。總者。總下銍。秣禾穗與藁。總皆送之。周禮掌客待諸侯之禮。有芻有禾。此總是也。或曰禾藁曰總。入之供飼國馬。銍護禾短鎌也。詩云奄觀銍刈。以銍貢者。謂半藁也。去皮曰秣。郊特牲曰。莞簞之安而藁秣之設。謂之服者。三百里內去王城近。旣納總秣銍而。又服輸將之事也。總納繁重。故惟百里之內納。

之。若二百里則去總而納銍。三百里去藁麤皮。  
 四百里則簡銍而納粟。五百里又遠則去殼而  
 納米。近者重而遠者輕。重者麤而輕者精。賦皆什  
 一。力則以遠近輕重耳。甸服最近，故每百里即  
 為一節。侯服稍遠，近者供役，故二百里內各為  
 一節。三百里外共為一節。綏要荒去京師益遠，  
 每服分而為二。治近者詳而治遠者略也。古者  
 天子中千里而為都。公侯中百里而為都。天子  
 之都東西南北所貢入者不過五百里。諸侯之

都所貢入不過五十里。所以挽輸不勞也。禹之  
甸法。通于天下。詩奕奕梁山維禹甸之。王畿獨  
以甸名者。農事國之本也。京師聲名文物之所  
萃。四方百貨之所聚。其民易以棄本逐末。制名  
甸服。示天下以務本重農也。帝王建都。必擇衣  
食之地。而謂之京師。京大師衆也。言天子之居。  
既衆且大。非衣食之豐。不可以爲國。故冀州不  
言貢。而專以總銓秸粟米爲賦。冀州供蠶絲。豫  
州貢絺紵。則衣服資焉。若夫大賂南金犀革象



齒珠貝之類。皆遠于畿甸。而或貢于要荒之服。焉。苟帝王以爲貢篚之要。國家所急。則堯舜之。都。遷于荆梁久矣。其肯以冀爲都。區區禦大河之患。圖一日之安耶。及周之衰。荆揚陷于吳楚。貢金不入。而天王求之于魯。蓋以魯通于吳也。是豈聖人制貢之初意哉。且甸服之民力穡。則京坻之積。不抑給外藩。亦足以壯根本而消窺伺。防漸之意。激矣。自漢都關中。轉漕關東粟。以給中都官。歲不過數十萬石。其後漕穀至四百

萬斛用卒六萬人。所在騷動。唐全倚辦江淮。然太宗以前。運粟關中。不過二十萬石。玄宗時。韋堅漕粟四百萬石。大盜繼起。而漕事亦壞。宋初運江淮米數十萬石。以給兵食。寢假而汴河歲漕至六百萬石。元人爲歲漕不至。乃議京東海田。城門一閉。無所得食。多抱珠玉而死。皆以不講旬服之義。而集游惰于京師。虛口坐食。以致王畿之重。全倚漕運爲咽喉。一日食梗。其斃可立而待。國朝定鼎燕薊。即古冀州之墟。先年有

議與西北水利者。卒格不行。而歲漕東南粟四  
百萬石以爲常。然西山一帶多有水田遺址。而  
天津涿鹿邇來增墾彌望。禾黍未嘗無利也。似  
宜專制勸農之官。開渠履畝以廣積貯。可以省  
飛輓之勞。可以限戎馬之足。不至根本空虛。全  
仰外運。所禱豈淺鮮哉。蘇秦說燕亦云粟支二  
年。且謂民雖不田作。而粟粟之實足食于民。今  
京師實古燕地。而樹藝鹵莽。緩急無備。良足歎  
也。至甸服之名。亦古今不同。唐虞稱服。殷周稱

畿。或曰國畿。或曰王畿。周公因禹所弼除畿內。更制天下爲九服。千里之內。謂之王畿。王畿之外。爲侯服。侯服之外。爲甸服。其法因井內而制。軍賦地方一里爲井。井十爲通通。通十爲成。成方十里。十成爲終。十終爲同。同方百里。同十爲封。封十爲畿。畿方千里。擬封百萬井。先王之有天下也。規方千里。以爲甸服。以供上帝山川百神之祀。以備百姓兆民之用。以待不庭不虞之患。其餘以均分公侯伯子男。使各有寧宇。以順及

天地無逢其災害。又先王之制。邦內甸服。邦外  
侯服。衛侯。賓服。蠻夷。要服。戎狄。荒服。甸服者祭。  
侯服者祀。賓服者享。要服者貢。荒服者王。日祭。  
月祀。時享。歲貢。終王。大抵各有不同。而天子止  
自食其畿內。千里之外。止貢土物。三代以上所  
同也。丘氏濬曰。虞夏之世。天子之田。上  
所謂五百里。四方相距各千里也。其所  
以食人。藁以飼馬。無非以爲國用。然因地遠近  
各有遠近之等。精粗之異。非若後世之無別焉。

又曰漢唐都長安宋都汴梁皆去邊遠我朝  
都燕則自以都城爲北邊捍蔽北最近而東次  
之。西又次之。南爲最遠焉。當效漢唐故事。立爲  
輔郡。以宣府爲北輔。因其舊而加以番守之事。  
俾守國之北門。其東也以永平爲輔。以守松亭  
一帶關隘及阨遼左要害。其西也以易州爲輔。  
以守紫荊一帶關隘。其南則以臨清爲輔。坐鎮  
牋河。而總扼河南山東之衝。又自此而南屯兵  
于徐州。以通兩京之咽喉。每處屯重兵一二萬。

量緩急以多寡其數。罷兩直隸河南山東上京  
操備班軍。因地屯守。以爲京師屏蔽。遇有事調  
發。則國家省轉輸之勞。邊方足備禦之具矣。

五百里侯服百里采二百里男邦三百里諸侯

此五百里始有諸侯。故曰侯服。又曰斥侯而服  
事也。大夫有采以處其子孫。采蓋食邑也。人君  
賜臣以邑。采取賦稅。謂之采地。何休曰。謂不得  
有其土地人民。采之取其租稅耳。又采官也。因  
官食地。故曰采。爾雅曰。采。寮官也。周官任土之

法以家邑之田任稍地。以小都之田任縣地。以  
大都之田任疆地。家邑大夫之采地。即家削之  
賦也。小都卿之采地。大都公之采地。王子弟所  
食邑。邦都之賦也。張氏載曰。采地所得亦什一  
之法。其餘歸諸天子。所謂貢也。諸侯卿大夫采  
地必有貢。貢者必于時享。天子皆廟受之。所謂  
幣餘之賦也。呂祖謙曰。周禮一曰牧以地得民。  
是畿外諸侯世爵者也。二曰長以貴得民。畿內  
諸侯世世受采地者也。男任也。任王者事。侯者



侯也。侯逆順也。言男則子在其間。言侯則公伯在其間。男邦小國。自三百里以外皆諸侯大國也。小國在內依天子而國。大國在外以禦侮也。古者建國。率小大相繼。其邊國皆大國也。寰內則以家邑小都大都爲中外之差。寰外則以諸男諸子諸伯諸侯諸公爲中外之差。諸侯封不過百里。象雷霆百里。所潤雨同也。雷者陰中之陽也。諸侯比王者爲陰。南面賞罰爲陽。法雷也。七十里五十里。差功德也。

五百里綏服三百里揆文教二百里奮武衛

綏安也。內安中國，外安邊疆也。王者之施政教，總期乎安靖，文武並用，一張一弛，安民之務也。或曰：安服王者之政，不俟要束而自服也。揆度王者之政教而行之，恐率于文法，有所窒塞。故文教必揆也。武以衛言，保護而已。治世武事易弛，故奮以修之。內三百里，非廢武衛，而文其所重。外三百里，非無文教，而武其所急。自綏服而內爲華夏之地，外爲夷狄之區。綏服介華夷之

中。文治內。武治外。辨之于微。防之于豫也。漢魏使外夷入居中國障塞之地。至西晉有劉石之禍。石晉以盧龍賂契丹。至重賁有耶律之難。綏服嚴華夷之辨。萬世不易之法也。

五百里要服三百里夷二百里蔡

要。微也。邊徼也。或曰要結奸信而服從之。要東以文教也。又如裳之有要。所以綱統四裔。夷者易也。無中國禮法也。蔡法也。放有罪曰蔡。法三百里而差。或曰蔡之言殺。滅殺其賊。

五百里荒服三百里蠻二百里流

要服可以要結爲戎索也。荒則荒忽無常，不可  
以人情測矣。夷猶易也。蠻則慢也。甚于夷矣。流  
則遠放之。罪重于蔡也。或曰蠻之言緝也。以繩  
束物之名。流如水流。其俗流移無常。政教隨其  
俗也。又流行無城郭常居也。夫流與蔡並在蠻  
夷之外。則帝王之擯小人嚴于防夷狄矣。苟徒  
驅之出境使雜居狄戎中。猶懼其相誘爲非。故  
更驅而外之也。五服之說不一。鄭玄以爲五百

朝。是則侯衛以降。聖人雖制之服。而不必其來。若職方氏掌天下之圖。辨其邦國都鄙。必兼夷衛之初封。人民氏族土田分器。至詳至悉。未有一言及附庸者。然又有一說焉。冀禹之所都。冀之北境。自雲中九原二千五百里。且至于沙漠不毛之地。周之東遷。洛陽爲土中。曹去王城八百里。猶在甸服。鄭在河南密縣百七十里。已爲男服。蓋曹順流極便。而鄭則成臯虎牢之險。夫豈五服非若畫棋局然。以定遠邇也。是故幽州

者也。周之王畿與禹甸服同。不言五百里而兼言千里。是計其兩面之相距也。禹五服總二千五百里。兩面相距凡五千里。周九服通爲二千二百五十里。兩面相距爲四千五百里。并王畿千里。其增于禹者。五百里之蕃服耳。然周之蕃服雖不列于禹貢九州之外。而禹貢九州之外。咸建五長。東漸西被。卽成周蕃服之域。是周之蕃服。其名雖增于禹。而其地未嘗增也。周禮雖稱九服。周官止曰六服羣辟。又曰六年五服一

里制定于堯乃禹弼之每服之間更增五百里  
面別至于五千里相距爲方萬里夫禹之功在  
平治山川不在拓境廣土玄之說難可據信也  
但周禮王畿之外有侯甸男采衛要夷鎮蕃九  
服服別五百里是爲方萬里漢土東西九千三  
百二里南北萬三千三百六十八里其所言山  
川不出禹貢之域而里數何以頓異易氏曰禹  
之五服計其一面之數周之九服計其兩面之  
數禹之甸服千里而止言五百里是計其一面

通于碣石。而共工流。蒼梧遠于衡山。而虞舜狩。  
章俊冒曰。先儒謂禹服據壺空鳥路。方直而計  
之。漢里謂著地人跡。屈曲而量之。此殆不然。古  
者百里當漢一百二十里。禹貢五千即漢之  
六千也。况五服萬里。當以東西四正爲據。堯都  
平陽。正東至東萊之海二千八百里。正西至張  
掖之流沙三千三百里。是僅可以滿五服之制  
也。兩漢九千里。則以遼東之海與燉煌之流沙  
而言。一在東北隅。一在西南隅。非其正也。夫正



方一尺者。袤之而度其兩隅。則爲尺有四寸。而  
贏。則五服之制。舉其隅而度之。宜其九千里也。  
漢制南北萬五千里者。舉朔方日南而言。而禹  
貢所屆正南及衡山之陽。而日南又在衡山之  
南八千餘里。非禹迹所及也。平陽之北。不盈千  
里。已爲戎狄。是五服之制。惟東西南三方爲然。  
北方僅滿二服而已。尚何鳥道之云乎。九州四  
正雖近。四隅實遙。五服之制。乃舉其近。蓋不欲  
以一時廣大之名。啓後世無厭之禍也。羅泌曰

禹貢四正疆理。東至瑯琊之海。西積石之河。五千里而縮。南至衡山。北泊單于府。五千里而贏。使皆封建百里之國。惟堪二千五百。總并遼東。渤海。長城外。盡契丹。高句。驪。積石。塞黑水。赫。靺。流沙之地。亦不能五千國。况今百二十一里六十步。烏有所謂萬區百里國哉。呂覽言神農封建。彌。近。彌。大。彌。遠。彌。小。以大運。小使。臂使。指之道也。孟子曰。海內之地方千里者九。古之天下方三千里止矣。五千里者。古今盛衰。山川菜藪。

之通數也。周世九服號七千里。而職方藩畿爲方萬里。斯亦未記之數。王畿所止亦曷嘗千里哉。周之西都。今之關東。而東都則洛陽也。二都地踞南山之陰。北山之陽。東西長。南北短。短長相補。猶不能以千里。王畿四方相距爲二方千里。遠郊近郊。甸地稍地。小都大都。率相距爲百里。豈能容哉。固知畿服諸說。上世必有陰補相乘之道。爲疆理之定制者。

東漸于海。西被于流沙。朔南暨聲教。訖于四海。禹

錫玄圭告厥成功

此推聖化所及也。中國之地，南北比東西爲遠。故禹貢言聖人聲教之所及，于東曰漸，于西曰被，皆指其地言。而于南北則止曰暨。見聖人嚮明之治，自北而南，日拓而遠，不可限量也。東漸于海，海之地盡矣。西被于流沙，流沙之外猶有地焉。漸如水之漸積，底于海者也。被如天無不覆，天所覆被，聖化皆可至也。其所以漸被暨及者，風聞之聲，神化之教，使之聞而振動，未嘗體

國經野。以內治治之也。蓋天地間華夷有限。華處乎內。夷處乎外。各止其所而天下之理得矣。禹跡所及。惟有東海。而言四海者。猶言四方也。海。晦也。永承穢濁。其水黑如晦也。爾雅云。九夷八狄。七戎六蠻。謂之四海。蓋天地四方皆海水相通。地在其中。蓋無幾也。夷狄戎蠻形類不同。總謂之四海。言皆近于海也。四海之外。復有海。云。湯問于夏革曰。四海之外。奚有。革曰。猶齊州也。湯曰。汝奚以寔之。革曰。朕東行至營。人民猶

是也。問營之東亦猶營也。西行至幽。人民猶是也。問幽之西復猶幽也。是以知四海四荒四極之不異是也。列子曰。渤海之東不知幾億萬里。有大壑焉。實惟無底之谷。名曰歸墟。夫九州惟揚徐青冀濱海而皆在東偏。西被流沙而不見。西海。北嘗至碣石而北海之名不著于經。且非正北也。廣南爲南海而禹服南越尚有徼外。漢武帝事遠。西北二海遂有身歷之者。條支之西有海焉。後漢班超又嘗遣甘英輩親其地。至于

西海之西。又有大秦焉。若北海則又甚遠。霍去  
病封狼居胥山。其山實臨瀚海者北海也。蘇武  
郭吉皆爲匈奴所幽。真諸北海之上。而唐史載  
突厥部北海之北。更有所謂骨利幹之國。在海  
北岸。然虜地所稱海者未必真海。凡青海西海  
蒲類海之屬。皆衆水鍾爲大澤。如洞庭彭蠡之  
類。借海名之。蓋塞外有水即名爲海。猶河北得  
水即名爲河也。洪邁曰海一而已。地之勢西北  
高而東南下。所謂東北南三海其實一也。北至

于青滄則曰北海。南至于交廣則云南海。東漸吳越則云東海。無繇有所謂西海者。詩書禮經所載四海。蓋引類而言之。漢西域傳所云蒲昌亦灣。居一澤爾。其英所臨大海。蓋即南海之西云。吳徵曰。海之環于東南西北相通也。而西海北海人所不見。何也。西北地高。或踞高窺下。則見極深之壑。如井沉沉然者。蓋海云。東南地卑。海水旁溢。不啻萬有餘里。中國之地。廣輪萬二千里耳。而東連海岸。以勾股稽之水之所浸。倍



于中國之地者，二十而羨。其間洲島國土，不可勝窮。若三神山者，不知其幾也。丘氏濬以爲國家祀東海于登州，祀南海于廣州，二祀皆臨海而祭。西海則望祀于蒲州，北海則望祀于懷慶。今日建都于燕，往南而祭，豈天子宅中之義哉。古謂青州爲北海郡，去登不遠，猶以是名。今京師東北乃古碣石淪海之處，于此立祠，就海而祭，爲宜。若中國之正西，在于秦隴，西南則蜀，稍南則滇也。滇之極西，百夷之外，聞有大海，通

西南島夷。此地在前代未入中國。今既爲羈縻之地。則王化之所及也。宜于雲南望祀之。李贄則以爲中國惟正東有海。四川天下之正西。山西其正北。雲南天下之西南。陝西其西北。皆不見有海也。廣東即南越地。可以爲正南之海矣。然閩廣接壤。亦僅可謂之東南海耳。故西北南正面皆無海也。且天下之水皆從西出。陝西四川雲南之水皆東流注于東海。則三省皆去海甚遠可知也。三省之外。其地更高可知也。不然

何以不川流而西。注彼西海。而乃迢遞逶迤。必  
向東南耶。然則雲南只可謂之東南。而不得謂  
之西南矣。故據今人所歷地勢論之。尚少正南  
與西南。正西與西北。正北與東北諸處。以不見  
有海。故卜之也。總之大地無窮。孰能測其所極。  
而海環地外。更爲茫茫。近者西洋浮海至者。謂  
地與海本圓形。而同爲一球。居天球之中。如鷄  
子然。黃在青內。天分三百六十度。地亦同之。每  
度廣二百里。南至北。東至西。各七萬二千里。地

厚二萬二千九百餘八里。上下四旁皆生齒所居。凡足所竚。即爲下。首所向即上矣。且自述其由大西浮海入中國。轉南過大浪山。已見南極高三十六度。則大浪山與中國相訖待可知。其言甚闕肆。今止以歷代封域之可紀者言之。漢攘却胡越。南置交阯。北置朔方。道里甚廣。唐東西九千五百一十一里。南北一萬六千九百一十八里。東至安東。西至安西。南至日南。北至單于都護。南北如前漢之盛。東不盡玄菟樂浪。西

則過之。宋東西六千四百八十里。南北萬有一千六百二十里。東南皆至于海。西盡巴夔。北際中山。而盧龍山前後十六州爲契丹所有。夏人割有靈夏。古雍冀西偏沒焉。于禹迹亦大屈矣。元南北混一號踰于古。然羶吾中土。不足道。

明興縱一萬九百里。衡一萬一千七百五十里。東盡遼左。西至嘉峪。南迄于海。北抵沙漠。遠過于宋。而方之于漢。北不盡朔方。東不盡玄菟。樂浪。南不盡南交。惟開瀛南爲益拓。云天限華夷。

大漠限北狄。流沙限西戎。滄海限東夷。谿嶺限南蠻。若有意焉。而自秦以上西北衰。東南感。自秦以下。東南展。西北縮。亦古今之大運也。賈捐之曰。四海欲與聲教。則治之。不欲與者。不強治。斯帝王之道與。玄水色。水土既平。禹以玄圭爲贄。而告成功于舜也。今越州禹廟元圭。匱藏之。色黑如磬。徑五尺。厚寸餘。圭古作珪。瑞玉也。上圓下方。以象天地。以封諸侯。尚書旋璣。鈐曰禹開龍門。導積石。出玄圭。刻曰延喜玉。受德天錫。

佩。蓋古者以德佩。禹有治水功。故天佩以玄玉。遁甲開山圖曰。禹至會稽得赤珪如日。碧珪如月。以自照達幽冥。禮緯稽命微云。天命以黑。故夏有玄圭。天命以赤。故周有赤雀銜書。天命以白。故殷有白狼銜鈎。論衡云。禹母吞薏苡。將生得玄圭。多傳會云。蘇傳云。以五德王。天下所從來尚矣。黃帝以土。故曰黃。炎帝以火。故曰炎。禹以治水得天下。故從水而尚黑。殷人始以兵王。故從金而尚白。周人有流火之祥。故從火而尚

赤。湯用玄牝。蓋初克夏。因其舊也。詩曰有客有  
客。亦白其馬。是殷尚白也。帝錫禹以玄珪。爲木  
德之瑞。是夏尚黑也。此五德所尚。見于經者也。  
羅泌曰。黃帝之世。天先見大螻大螟。黃帝曰。土  
氣勝。故其色尚黃。其事則土。兩金櫟陽。禹曰。金  
氣勝。故其事用金。然其受命荷帝玄玉。故其色  
尚黑。下至湯代。金兩先生于水。湯曰。金水勝。故  
其色尚白。其事則水。及夫武王。火烏流社。武王  
曰。火氣勝。然其衰在木。火生于木。故其色尚赤。



其事則木。許氏曰禹貢專爲紀水之成功，而併及貢賦之數，故九州紀水道土色田賦之等，貢物貢道爲詳，餘皆或見或不見。古史言簡而意密，則又有言外之意。惟冀梁雍言山獨詳，諸州不言者，天下之勢西北高而多山故也。徐雖言山，乃蒙羽之小者。又止言藝，則不專主于導山。冀青梁不言澤者，冀梁多山而地峻，青邊海而水易洩，故三州無澤也。雍雖多山而豬野在其西北之偏，黃河之外，地形稍下，故有之也。揚荆

豫梁不言原隰者。諸州有大澤者無原隰。有原隰者無澤。揚州彭蠡太湖其浸甚大。荊州雲夢澗數百里。豫之滎波荷澤孟豬皆巨浸。則原隰之地因少矣。兗徐雍二者皆有者。兗止言宜桑之土耳。而雍州豬野在河外。原隰在河內。相去甚遠。惟徐之東原不同。東原地甚卑。常有水患。雖曰原。其實下隰。謂居洑之東而稍高爾。梁州二者皆無者。爲多山而下不足豬水。且無曠平之地也。梁雍無篚者。多山之地。唯出獸皮。而所

織爲屬。不假于篚也。交荆豫不言夷者。凡地接于山海邊陲之地。則有夷。豫居天下之中。荆雖居于南。而禹貢之地。不踰嶺。交雖在東北。而其東南則接青徐。西北皆冀境。故三州無夷也。兗徐揚獨言草木者。三州在東方。皆河淮江之下流。被水特甚。草木不生。今水旣洩而生草木。故特書此以表地平也。至于冀州不言境域及貢篚。則傳已言之矣。金氏曰。天地常形。固相爲句連貫通。然其條理亦各有脉絡。若以脉絡之

可見者言之。崑崙四垂而爲海。天下諸山皆起于崑崙。而崑崙無定名。地之最高。山之所聚。江河諸原之所出。即崑崙爾。崑崙之上。綿亘糾繆。句連盤錯。其南爲岷山。而岷山最大。其北爲積石諸峰。其東爲西傾。朱圉。鳥鼠諸峰。其西北諸山。尤爲綿亘紛錯。河之所以北。弱水之所以西。黑水之所以南。皆是也。惟江淮河漢行乎中國。自崑崙而東北言之。則自積石而北爲湟水。星海。青海。以至浩亶。皆河原也。入匈奴以東爲陰。

山又東南自代北雲朔而南趨爲北岳。以至太行爲北之脊。壺口雷首太岳析城王屋皆其羣峰。河之折而南。汾晉諸水之所以西入河。涿易漳滏恒衛之所以東入海也。分而東趨者行幽燕之北。爲五關之險。以至營平而爲碣石。此北絡也。自崑崙以東言之。則東爲西傾而洮水出其北入河。桓水出其南入江。又東爲朱圉烏鼠諸隴。則爲渭之源。自渭源以北。即夾河源而北以東。若岍岐若荆山諸峰。涇水漆沮諸源也。自

渭以南即西傾而下諸峰亘爲終南。屹爲秦華。東北爲穀。陝東南爲熊耳。外方伊洛之源。又南爲桐栢。淮源以達于淮。西諸山。此中絡也。又自西傾朱圉而南。分爲崒冢。漢源夾漢而趨者。北則終南。華熊諸隴。南則蜀東諸峰。說者謂蜀東諸山皆嶓冢。正謂其岡岫綿亘爾。又東則爲荆山。內方。此中絡之次也。自崑崙之東南言之。是爲岷山。江源夾江而東者。北支則西傾以南。嶓冢以西之脉爲桓水。西漢水。嘉陵江諸源。其南

支即南趨爲蒙蔡諸山。青衣大渡馬湖江諸源。又東包涪黔。一盤而北爲三峽。其東出者。包絡九江之源。中盤中爲衡山。其再盤而北爲廬阜。其嶺之東出者。又爲袁吉章貢盱信諸山之源。至分水魚梁嶺。三盤而北。過趨新安峙天目。盡昇澗。凡再盤之間。其水聚爲洞庭。三盤之間。其水聚爲彭蠡。三盤以東。則南爲閩浙。北爲震澤。此南絡也。惟泰山則特起東方。橫亘左右。以障中州。此所以爲異歟。大抵水者山之液。故山盤

而水之源出焉。此所以聚而爲川流之盛。地道以句連爲固。故山東而水之流壅焉。此所以資于疏闢之功。此其大約也。